

四庫全書

集部

欽定四庫全書

東澗集卷四

宋 許應龍 撰

制

權刑部尚書兼權吏部尚書李鳴復除端明殿  
學士簽書樞密院事制

精神折千里之衝方恢遠略文武為萬邦之憲允賴真  
儒擢諸喉舌之官付以樞機之寄肆頒渙號式副具瞻  
具官某識敏才高氣和節勁備光大含洪之德休焉有

容無黨偏好惡之私粹然出正晉登憲府大振朝綱典  
銓如止水之平論事有回天之力善於其職既允穆於  
師言庸嘉乃勲遂擢居於右府升華秘殿增錫爰田噫  
輔予一人既善謀而善斷式是百辟當同德以同心益  
展壯猷輔成至治

吏部尚書兼給事中兼侍讀余天錫除端明殿  
學士同簽書樞密院事制

朕治欲更新人惟求舊尚書納言喉舌雖有賴於論思

執政猶吾股肱盍益隆於委寄肆升右府式渙明綸具  
官某望重羣公才周萬務好賢樂善休焉其如有容遇  
主遭時進而不失其正自登儒級晉陟周行毋日月以  
為功徧歷清華之選上星辰而聽履更宣彈壓之威既  
夙著於休聲屢興思於宣室況有附翼攀鱗之舊宜膺  
任人共政之圖遂寄徑於天官旋升班於樞筦併躋端  
殿中衍圭畬吁是究是圖方欲理內而御外汝為汝翼  
當思強本以折衝底寬宵旰之憂亟底敕寧之績欽承

予命時乃之休

金紫光祿大夫右丞相兼樞密使喬行簡特授  
觀文殿大學士醴泉觀使兼侍讀制

門下寅亮天地實司洪化之權變理陰陽允謂經邦之  
道既勤輔翼必遂感通何引咎以自陳屢抗章而丐去  
爰頒異數曲徇高懷具官某節挺後凋道推先覺介然  
有守中不倚和不流公而忘私德可尊事可法久任獻  
納論思之職晉登凝承輔弼之司知無不言每務防微

而杜漸引之當道未嘗揚已以取名迨晉長於秉樞益  
憂邊而思職爰立作相暨予同心進思盡忠文武為萬  
邦之憲定而能慮精神折千里之衝屬屆明禋脩聞震  
電茲高穹之示戒念精意而欽承乃荐上於囊封遽力  
求於策免側身修行朕方懷寅畏之思當軸處中爾盍  
圖銷弭之實胡為勇退莫遂挽留作朕股肱既久著勤  
勞之績全其體貌盍愈加恩渥之隆秘殿升華真祠均  
佚俾輔成於台德仍進讀於經帷茂對殊休以光晚節

於戲予欲汝為汝翼當仰體於深知爾有嘉謀嘉猷尚  
毋忘於忠告以永終譽益懋遠圖

特進左丞相兼樞密使鄭清之特授觀文殿大

學士醴泉觀使兼侍讀制

門下王者承意而從事每懷寅畏之思宰相理物以代  
天實任變調之寄欲潛銷於變異當共致以嚴恭胡辭  
政柄之司屢上囊封之奏勉從雅志爰錫湛恩具官某  
心正氣和量宏識遠卓爾負廟堂之器瀟然如山澤之

癰舊學於甘盤已致緝熙光明之益選衆舉伊尹晉登  
凝承輔弼之尊屬當更化之初首任秉鈞之重收召耆  
哲拔去凶邪以廉律貪一洗舊汙之染量能授職咸欣  
公道之開雖振厲以更新每彌縫而藏用入而陳善為  
格君心之非出以告人曰惟我后之德期予于治時乃  
之休何積潦之甫停至明裡而復作皦皦震電昭垂警  
戒之機翼翼小心敢替側修之謹將欲致和於枹鼓曷  
嘗移咎於股肱乃荐騰引去之章竟莫遂挽留之意肆



升華於秘殿仍進讀於經帷全其素節之高假以真祠  
之佚於戲學於古訓尚資良弼之交修克享天心罔俾  
前賢之專美以永終譽茂對殊休

知福州余天錫除吏部尚書兼給事中兼侍讀  
制

銓綜人材凡屬天官之掌維持政本實歸瑣闥之司矧  
進讀於經筵尤輔成於君德獨兼茲選允謂殊榮具官  
某學粹而才通量洪而識敏自登儒級亟躋朝路之華

不出都門峻陟文昌之位念久安於閑館俾出鎮於全  
閩然道阻且長莫便庭闈之奉而人惟求舊趣歸禁近  
之班冠常伯而專封駁之權侍書帷而輔緝熙之學既  
清且要其任匪輕往服厥官當體眷懷之篤以報其上  
盍殫獻納之忠時乃之休以永終譽

同簽書樞密院余天錫除簽書樞密院事制

折千里之衝已賴樞機之密加一級之賜式彰簡眷之  
隆渙跽誕敷師言允穆具官某氣和識敏學邃行醇以

仁存心每務愛人而利物有猷告后曷嘗揚已以取名  
徧歷清華晉司宥密憂邊思職並處置以得宜同寅協  
恭善彌縫而藏用人無異議朕所深嘉肆陞右府之班  
叶贊廟謨之運進封公爵申錫爰田雖率舊章實昭新  
渥噫竭股肱之力加忠貞以輔一人庶道德之威成安強  
以清四海祇若朕命益展壯猷

司農寺官高定子除司農卿魚王牒官魚樞密  
都承旨制

積貯天下之大命也隸於大農而卿實總之苟匪通才  
曷稱厥職以爾學粹詞宏氣和心正施於政事所至有  
聲江左將輸公勤辦治戎監外府之擢未酬爾勞九扈  
正卿肆以命汝纂修瑤牒俾贊樞庭疊昇榮恩以階顯  
用益宏遠業庸副深知

簽書樞密院事李宗勉除參知政事制

強本折衝已賴樞機之密任人共政尤資丞弼之良爰  
命真儒肆頒渙號具官某才高識遠外寬內明正色立

朝蹇蹇屬匪躬之節愛君憂國惓惓懷納善之忠允謂  
蓋臣晉登右府隨機應變克壯其猷協恭和衷同底於  
道肆擢躋於參預俾盡展於經綸式循邦典之彝載陟  
文階之峻復增多邑申衍圭畬噫道德之威成安強予  
欲茂中興之業股肱之寄在忠力爾其殫叶贊之勤時  
乃之休以永終譽

林光謙除樞密院編修官依舊督府主管機宜  
文字制

外著勞能內升職任所以為趨事赴功之勸也以爾通  
變之才隨試輒效丞戎監而佐督幕游刃恢恢經理兵  
儲不勞而辨宜進編摩之職以旌爾能益究乃心嗣有  
殊擢

高奎除樞密院檢詳諸房文字制

本兵之寄其責甚重協贊謀畫尤貴得人以爾有文有  
學知微知彰比任編摩繼登宰掾廟堂密務蓋知之詳  
講之熟矣與其出秉於麾節孰若入佐於籌帷其展壯

猷以階顯用

韓大倫除中書門下省檢正諸房文字制

朕為官擇人必先歷試善於其職遂使為真以爾公而無私勤而且敏剴煩治劇綽綽有餘昔兼省闥之司密贊廟謨之運既能勝任何以假為爰正厥官以昭予眷仍總提於國用俾展布於才猷勉績前功嗣膺殊擢

禮部尚書游似除吏部尚書制

八座班聯雖俱高於法從六卿職掌尤莫重於銓曹疇

咨已試之長爰錫維新之命具官某性資和粹學術邃  
深久徧歷於清華每自安於靖退侍邇英之讀納誨輔  
台任宗伯之司修禮明樂比典省闡之舉咸推藻鑑之  
公載念冢鄉實總文部既能選士以考實豈難為官而  
擇人况嘗攝承僉謂簡要肆予命汝式資甄別之精惟  
時懋哉庸試陶鈞之業以永終譽嗣對殊休

兵部侍郎魚權吏部尚書趙彥忭除權吏部尚  
書制



惟爾之能宜任銓曹之寄試可乃已遂申渙號之頒允  
穆師言式昭隆眷具官某被服儒術標的宗盟老成而  
有典刑可尊可法靖共而好正直不倚不流勸講經惟  
升華武部屬闕天官之長式資氷鑑之明僉謂清通宜  
用委任爰正文昌之秩仍兼瑣闥之司往既乃心以稱  
朕意

戶部侍郎兼權兵部尚書兼知臨安府趙與權

權戶部尚書制

八座班聯實高於法從六卿職掌莫劇於民曹疇咨已  
試之長爰錫維新之命具官某被服儒術標的宗英剛  
而義簡而廉來能名至能應自陟地官之貳兼司天府  
之雄扶弱抑強里閭安業散財發廩稭耄懷恩撫軍如  
挾纊之溫禱雨則隨車而至雖攝大司馬之職未酬京  
兆尹之勞肆頒綸恩擢冠民部豈特究財賦之本末尤  
有資朝夕之論思爾所優為奚勞多訓

權戶部尚書趙與權除戶部尚書制

京師衆大之區既騰偉績民部劇煩之任尤賴長才爰  
畀真除式昭隆委具官某至剛而直大雅不羣母日月  
以為功亟躋華貫上星辰而聽履魚領神臯善政得民  
休聲載路宜正文昌之位以旌治行之優載念版曹實  
司國用善於其職已洞究於源流圖惟厥終庶永臻於  
豐裕益觀來效嗣有殊榮

宣奉大夫鄒應龍除禮部尚書制

不見賈誼久勤宣室之思僉曰伯夷宜錫秩宗之命肆

頒召節趣使造朝具官某器度恢宏風規峻整與學探  
聖賢之蘊魁名滿宇宙之間入則徧歷於清華出則荐  
臨於藩屏屬予踐阼之始畀以納言之司胡厭直於承  
明乃久安於真館雖辭榮避寵固欲全素節之高然思  
治勵精詎可後舊人之任遂頒渙渥復位文昌其殫日  
月獻納之忠益振夙夜寅清之譽以階大任式副具瞻  
權工部尚書李鳴復除權刑部尚書制

為官擇人方畀共工之任明刑弼教復新寵命之頒雖

均號於文昌實晉升於華武具官某風規凝重器局恢  
宏即之也溫備四時之和氣撓之不濁凜萬壑之層冰  
自陟憲臺力扶公道去其太甚每思激濁以揚清知無  
弗言未嘗矯枉而過正特授納言之職已為不次之除  
茲長刑曹益昭隆眷庶獄庶慎式資明允之才嘉謀嘉  
猷尤賴論思之益期予于治時乃之休

權禮部侍郎趙汝談除權刑部尚書制

明刑弼教期臻帝治之隆帥屬佐王允賴秋官之長疇

咨輿論無易者英具官某標的宗盟被服儒術入則代  
言於鰲禁出則奏最於熊轡典禮而作秩宗藹著直清  
之譽納誨而輔台德每殫啟沃之忠爰新渙號之頒晉  
陟文昌之峻庶獄庶慎豈惟資明允之才嘉謀嘉猷當  
愈罄論思之益往服厥職以副予知

起居郎兼權吏部侍郎王極特除吏部侍郎制  
載惟選部莫劇右銓文法舞於吏胥奸欺迭出簿書盈  
於几閣考察尤艱式資已試之長爰錫維新之命具官

某量涵溟渤秀挹岷峨每湛若以無營尤介然而有守  
義冠烏府不吐剛而茹柔秉筆螭螭善記言而書動比  
魚銓綜僉謂清通何以假為蓋示褒遷之寵肆予命汝  
益加甄別之精茂對殊休以階大用

兵部侍郎范鍾除吏部侍郎制

掌六典之貳而逆邦治其事實繁以三銓之法而官人  
材非賢曷任具官某學臻道閭譽冠時髦省事清心澹  
乎若深淵之靚修身端行渾然如璞玉之純粵從朝路

之登以至甘泉之從藹然碩望簡在朕心既振職于兵  
曹宜持衡於文部况昔居郎省已荐宣銓綜之勞今晉  
陟貳卿當益振清通之譽勿云序進嗣有恩榮

試中書舍人袁甫權吏部侍郎制

西掖代言方睹舍人之樣右銓典選亟躋小宰之班盖  
疇已試之長爰錫維新之命具官某氣全剛大望重魁  
倫言則成文得易直簡嚴之體施於有政馳公勤精敏  
之聲既左右之俱宜盍清華之徧歷敷文緯國已資潤



色以討論量能授官尤賴清通而平允肆予命汝欽乃攸司庶因衡鑑之公以卜甄陶之業

起居郎兼權吏部侍郎吳泳特除吏部侍郎制持衡銓部藹著休聲出綽斯庭真陞小宰雖事權之仍舊而渙渥之維新具官某識遠而才高氣和而節勁難兄難弟相輝臺省之間有德有言傑出搢紳之表惟所學之既正顧何施而不宜君舉必書咸稱直筆子言其代貢飾皇猷至兼銓綜之司藉甚清通之譽既云試可

何以旌能秩爰正於貳卿班益高於法從善於其職繇  
裁鑑之精明推其所為乃陶甄之事業益殫所蘊庸副  
予知

權兵部侍郎范鍾除兵部侍郎制

掌九伐之法已著休聲頒一札之書俾膺真命式昭隆  
眷以穆師言具官某溫乎其和介然有守徧歷清華之  
選晉升侍從之班勸講邇英每務輔台而納誨司戎亞  
旅益思立武以足兵比典禮闈克精藻鑑爰正貳卿之



秩載新渙號之揚以序而升姑徇曩章之舊度德而定  
嗣膺異渥之榮往服厥官以稱朕意

淮東總領兼知鎮江府吳淵除權兵部侍郎制  
克壯其猷已底要衝之固渙汗其號晉升法從之班以  
穆師言式昭隆眷具官某材高通變謀極機深至能應  
來能名直而溫強而毅入替樞機之密出宣藩翰之勞  
積倉裏糧贍給貌貅之衆蠲租減賦綏安鴻雁之民遂  
令鐵甕之區益鞏金城之勢厥有成績盍錫徽章趣覲

楓宸俾貳兵曹之任聯榮棣萼益增朝列之輝殫而獻  
納之忠贊我修攘之政善於其職時乃之休

侍御史李大同除權刑部侍郎制

正色立朝獨厲方剛之操以德詔爵蓋居侍從之班爰  
錫徽章式昭隆眷具官某道推先覺節挺後凋晉秩諫  
垣每務閑邪而陳善輔成君德未嘗揚已以取名典容  
臺而惟寅惟清秉直筆而記言記動欲大明於國是復  
擢寘於臺端乃以親嫌力求遜避載念刑曹之貳實持

邦憲之平儻非端介以無私寧免重輕之失當肆予命  
汝式資明允之才進思盡忠更賴謀猷之告益宏遠業  
茂對殊休

太府卿魚知臨安府史巖之除權刑部侍郎制  
選禮樂詩書之帥俾鎮神皋陞論思獻納之班式昭異  
渥藩宣增責委寄彌隆具官某心醇而氣和才高而識  
敏有是父有是子俱陟從臣難為兄難為弟並分戎閫  
然念京師之地實關風俗之樞惟爾之能足勝其任雖

正陟月卿之位未足重天府之權爰錫明綸晉貳憲部  
其體朕心之眷亟圖治效之優益懋遠猷以階大任

殿中侍御史李韶除權工部侍郎制

立朝正色既馳謇諤之聲任官推賢盍昇論思之職肆  
頒渙渥庸示隆知具官某公而忘私定而能應雖躋榮  
路每懷勇退之心既陟諫垣復厲敢言之氣旋登憲府  
益振朝綱然於激揚清濁之間初蔑好惡黨偏之意人  
無異議朕所深嘉疇若予工俾董繕修之政入告於內

盡殫剴切之忠茂對殊休以階大任

殿中侍御史李宗勉除工部侍郎兼給事中制  
進思盡忠允謂正直端方之士德以詔爵盡居言語侍  
從之班爰錫徽章庸昭隆眷具官某英姿玉立直節永  
清見善明而用心剛介然有守行已恭而事上敬知無  
不言每於激揚清濁之間初蔑好惡黨偏之意人無異  
議朕所深知俾晉貳於起曹仍升華於瑣闥資爾正色  
敢言之氣振茲批敕還詔之風益展大猷以階大用

右文殿修撰吳潛除權兵部侍郎兼檢正制

甘泉侍從之班必資重望省闈經綸之任尤賴通材儻  
匪其人曷兼茲職具官某學該流略名擅魁倫素節剛  
方有是父有是子紫荷輝映難為弟難為兄入則增重  
於朝廷出則馳聲於麾節非榮進素定曷膺大任之隆  
況才德俱高詎可久勞於外擢陞武庫仍冠都司其殫  
論思獻納之忠以基輔贊彌縫之業祇服休命永肩一  
心



蔡節除司農卿兼檢正制

倉廩委積悉賴大農雖設屬立貳以任其責而為之長者其職尤高雖以次遷實階顯用以爾疏通無壅庶靜寡求出典輔藩入登朝列郎闥寺監無施不宜省闥彌綸奉公守正力求外補勉徇雅懷然思多事之時正賴長才之用復還舊職進陟正卿益究乃心以稱朕意

王伯大除吏部郎中制

銓選之任其平如衡不容一毫之輕重也非公爾忘私

曷稱厥職以爾安恬有守詳練而明荐典侯藩廉勤不  
擾肅將使指風采聳聞摧寔銓曹師言允穆其以激濁  
揚清之志施之量材授職之間肆觀爾能嗣有褒寵

李劉陞禮部郎中制

郎官上應列宿其任匪輕由同而正必以資歷示不容  
以驟得也以爾學富淵源文諧韶濩演綸西掖嚮用方  
隆正陞儀曹姑循常典賢能不待次而舉當毋以日月  
為功也其祇成命即沐殊榮

李劉除禮部郎官制

儀曹之選事簡職清西掖北門皆繇此而進以爾高才  
天賦與學海涵作為詞章備雅健渾深之體迭更麾節  
藹寬和正直之稱僉謂真儒盍還清著載念南宮牋奏  
之職實資東里潤色之工惟爾之能足勝其任往祇成  
命以副朕知

韓大倫除金部員外郎制

國家財賦分隸四總而歸於版曹者二十餘郡百爾所

需皆仰於此苟匪通才曷勝其任以爾勲臣之孫滿然  
儒素廉勤通敏所居見稱比司餉臺究心措畫不加賦  
而用足朕甚嘉之擢實茲職誰曰不宜肆觀爾能尚有  
殊擢

劉煒叔除倉部員外郎制

廼積廼倉以供廩稍而給餽餉蓋國家急務也總其凡  
而治其要則屬之郎曹焉非得通才曷勝其任以爾毓  
德名門棣華爭秀踐更滋久所至見稱作屏廬陵公清

慈惠政平訟理吏戢民安茲予畀汝以倉曹之寄必能振舉厥職以副予知往究乃心嗣有褒擢

趙絀除都官郎官制

都官雖隸刑曹其事最簡然於除授必選真才以爾毓秀相門策勲儒級外庸綽著晉陟周行棘寺容臺各稱其職擢陞郎省庸示褒嘉往服厥官以需異擢

趙與權除刑部郎官制

法者一成而不易情者日出而無窮以有限之法馭無

窮之情非惟明克允之才豈能無輕重出入之差乎以爾登名桂籍得雋金科曩典刑曹明清詳審暨守輔郡察獄得情吏戢民懷政聲洋溢奪情予節毅然控辭禮制既終亟加召擢明刑之職乃爾所已試者往究乃心卽膺顯用

郭正己除刑部郎官制

朕於郎選每不輕畀矧刑曹所司尤關民命其於授任可不因能以爾得雋金科精於法理踐更棘寺閱歲滋

多用法端平下無冤抑擢丞宗正晉陟郎闈式資明允之才俾任平反之寄往祇厥職廣朕好生

曾天麟除都官郎官制

朕自更化以來作新吏治宰邑守藩以最聞者悉皆選用矧持節近甸藹然聲稱褒揚可後以爾難兄難弟中外交輝策足周行靖共有恪司庾東浙惠利及民擢寘郎闈以階顯用往脩厥職庸副予知

王會龍除工部郎官制

起部司營繕之事比諸曹為清簡擢居是職庸示優賢  
實為大任之基茲豈久淹之地以爾文追灝噩望重倫  
魁策足清班靖共正直部符輔郡慈惠公勤既內外以  
俱宜況榮進之素定甫任著庭之職即陞郎省之華茂  
對寵榮以需東拔

趙以夫除左曹郎官趙鼎除右曹郎官制

朕勵精思治量能授官凡郎選俱欲得人矧版曹尤為  
劇任擢居是職必考僉言以爾以夫報政臨漳民安惠



養持節江右吏服廉明茲予付汝以左曹之任必能理  
訟牒而稽邦賦以爾矜曩處都司䟽通精練今撫凋郡  
豈第公勤茲予命汝以右曹之職必能權斂散而均力  
役用既乃心往佐而長

史巖之除左司郎中制

二十四曹惟侍左為煩劇員多闕少法弊吏謾苟匪清  
通未易銓綜以爾克傳家學早擢儒科難弟難兄俱蜚  
聲於中外善政善教屢奏最於藩宣擢實銓曹必能奉

公守正以革姦欺往究乃心嗣有褒擢

王會龍除右司郎中制

都司分治六曹事無巨細畢陳於前若網在綱提之則  
舉欲稱厥職必惟其人以爾早掇鰲頭荐登駕列已久  
更於歲籥猶未越於郎闈雖器識不凡能自安於靜退  
然榮進素定難久鬱於才猷遂自銓曹亟陞宰掾暫假  
彌綸之手佇躋清切之班往究乃心以稱朕意

王蘧除右司郎中制

銓綜之任號為劇曹法例繁滋吏胥出入苟匪通敏曷使公平以爾心醇氣和量宏節勁踐更滋久晉典名藩節用愛人正身帥下藹然治最盡畀峻除棘寺為丞未究所蘊亟陞茲職益觀爾能往究乃心以稱朕意

陳康熙除左司郎中制

二十四曹而尚左居其首自京秩以上悉歸銓綜欲稱厥職必惟其人以爾宏博名門淵源碩學惟弼中而彪外故下筆以成章施諸承流宣化之間莫非利物愛人

之念肆頒召節擢寘郎聞胡屢抗於封章未欽承於渙  
渥今予命汝庸立懦以廉頑惠然肯來必奉公而守正  
當令銓法端若衡平益振爾之家聲以待予之器使

葉莫除右司郎中制

郎官上應列宿非持節把麾之有聲望者不畀也矧兼  
二職俱著休聲為官擇人所宜召用以爾廉明不擾公  
恕無私報政三期民安盜弭觀風一道訟簡刑清以若  
所為允謂儒者之政選諸所表俾膺郎吏之除往服厥

官以稱朕意

趙必愿除左司郎中制

朕於用人必以序進將久其任而究所長也以爾公族之英精通詳練被服儒術克紹祖風荐典名藩所至可紀彌綸省闈守正無私輿論稱之盡膺異擢由右而左姑借長才益究乃心以需簡拔

趙以夫除左曹郎官兼左司制

版曹都司俱號煩劇非資已試曷稱厥官以爾稟資信

厚遇事精明中外踐更何施不可京畿將漕方著休聲  
省部需賢無以易汝復畀郎闈之選仍升宰掾之司剖  
決彌綸各振其職皆汝所優為者益圖來效以副予知

趙必愿除度支郎官兼權右司制

不典州不為郎此祖宗良法也矧屢著郡最可後褒遷  
以爾家傳相業望重宗英不激不隨能定能應荐司藩  
屏俱號循良晉陟版曹仍兼宰掾益盡彌綸之職豈惟  
計度之精往究乃心以需異擢

王瓚除考功郎中兼檢詳制

考績之職寸量銖較其事夥繁非疏通精審曷勝其任以爾賢關之英材識兼茂以儒術而飾吏推善教而得民固已見於設施而兵事詳練尤為可稱擢真郎闈仍兼樞屬其委寄蓋不輕矣益據所蘊以副予知

監察御史錢相除右正言制

出入禁闥補闕拾遺必得正人始稱厥職以爾至剛以直特立無朋雖才德之俱高每韜藏而不耀擢居憲府

克振臺綱然於激揚清濁之間初蔑好惡黨偏之意人無異議朕所深知進陞諫省之華冀獲忠言之益引以當道時乃之休

樞密院編修官陳瑑除監察御史制

唐得李勉朝廷始尊蓋御史紀綱之府得人以振其職則一臺正而天下治矣以爾學有本源行無瑕玷上不誦下不瀆事可法德可尊樞屬郎曹靖共正直人皆以言路期之成命一頒善類胥懌開誠心而布公道進君



子而退小人使國論一定以成更化善治之功蓋爾所  
優為者尚克欽承以永終譽

駕部郎官王極除監察御史制

勿用儉人其惟吉士此朕勵精更化之本意也然人實  
難知易至雜揉必賴正色敢言之彥庶幾揚清激濁之  
公以爾德宇粹夷風規秀整施之政事已騰公勤明敏  
之稱其在朝廷益厲正直端方之操擢居憲府誰不謂  
宜然今日之患莫大於君子方盛而潛消小人雖衰而

暗長爾其彰善癉惡杜漸防微則天下可以常為泰而不為否矣往振厥職以副朕知

左司諫林略除殿中侍御史制

朕勵精思治為官擇人矧惟憲府之雄尤重副端之任欲稱厥職必惟其賢以爾望重儒宗文追古作徧歷清華之選晉居諫諍之司知無不言惟務閑邪而陳善引之當道未嘗揚已以取名允謂正人擢陞執法其維持於國是庸振起於朝綱式副予知以永終譽

左司諫李宗勉除殿中侍御史制

言事仗下雖資直節之忠執法殿中孰任副端之寄疇  
咨已試僉曰汝宜以爾不倚不流能定能應心無私主  
惟思激濁以揚清言必可行未嘗矯枉而過正放黜者  
有愧心而無怨更革者雖害已而謂然既允穆於師言  
宜久居於憲府渙發其號晉陞供奉之班往服厥官益  
振糾繩之職勿云序進嗣有褒遷

左正言李韶除殿中侍御史制

進思盡忠方賴格心之益渙汗其號晉陞執法之除庸  
示眷懷一新風采以爾靖共正直肅括宏深知無不言  
每務揚清而激濁引之當道未嘗炫已以取名允謂作  
者之七人奚愧先朝之四諫肆頒異渥進陟副端其以  
閑邪陳善之規施之正色敢言之地益振綱紀以尊朝  
廷

殿中侍御史林略除侍御史制

朕惟憲府俱職抨彈臺端尤為雄劇非賢不任必望實

之素字以次而升庶紀綱之愈振以爾身端行治學廣聞多即之也溫備四時之和氣撓之不濁凜萬壑之層氷雖内外之荐更每安恬而無競經帷勸講申義約文諫省進言閑邪陳善迨殿中之執法公天下以為心糾正官邪主張善類宜躋登於橫榻示旌表於蓋臣益思風采之揚庸副眷懷之篤以永終譽嗣對殊休

殿中侍御史蔣峴除侍御史制

朕躬親政事總攬權綱其於風憲之官必擇端方之士

既能執法可後疏恩以爾學問精深詞章道勁每因秘  
殿談經之頃屢聞嘉謀告后之忠肆推寘於副端俾力  
扶於公道介然有守寧肯吐剛而茹柔知無不言惟欲  
揚清而激濁晉登橫榻庸表正臣其殫報稱之思益振  
糾繩之職勿云序進嗣有殊榮

監察御史劉伯正除左司諫制

朕改過不吝從善如流載惟諫垣實司言責必得端方  
之士庶聞謇諤之忠以爾學問精深風規穀重靖共爾

位事可法德可尊糾察憲臺剛不吐柔不茹擢陞騎省  
冀納鯁言激濁揚清既足致朝綱之肅閑邪陳善必能  
格君心之非往服厥官以永終譽

吏部侍郎洪咨夔除給事中制

朕董正治官綱維政本念瑣闥邃嚴之地素號清華隸  
銀臺通進之司實專封駁欲稱厥職每難其人故自比  
年以來率以他官兼領茲得碩望盍畀真除具官某學  
廣聞多身端行治剛不吐柔不茹彊而義簡而廉屬當

勵精更化之初首任正色敢言之責紀綱大振賢否洞  
分為官擇人藉甚清通之譽敷文緯國燦然黼黻之華  
比兼掌於黃扉屢封還於紫詔疏恩元日正位夕郎仍  
躋進讀之班庸示殊常之眷以階大用益展壯猷

權吏部侍郎丁伯桂除給事中制

典選右銓方著清通之譽升華左省復專封駁之司允  
穆師言以昭隆眷具官某中而不倚休焉有容居烏臺  
則激濁以揚清立螭坳則直前而奏事敷文緯國燦然



黼黻之華量能授官允若權衡之審載惟青瑣尤賴鴻  
儒正色立朝既夙高於勁節批勅還詔必無愧於前修  
益罄精忠以需大用

吳昌裔除大理少卿制

廷尉天下之平也苟匪其人豈能無輕重出入之差乎  
特屈正臣典司邦禁以廣朕好生之德以爾直諒多聞  
安恬有守塞塞厲匪躬之節惓惓懷憂國之忠綽著休  
聲遂膺親擢務揚清而激濁不吐剛而茹柔正色立朝

既有言而必盡明刑弼教諒執法以無私擢諸栢府之  
中畀以棘卿之任欽予成命往服厥官





欽定四庫全書

集部  
東澗集卷五  
六

詳校官庶吉士<sub>臣</sub>瑚圖禮

主事<sub>臣</sub>呂雲棟覆勘

欽定四庫全書

東澗集卷五

宋 許應龍 撰

制

皇叔祖奉國軍節度使提舉萬壽觀主奉吳王  
祭祀天水郡開國公多謨加食邑食實封制

朕虔修祀事消選吉辛天施地生丕展精禋之報祖功  
宗德並嚴升侑之容維時公族之英實相躬祠之禮宜  
敷惠術誕告所庭具官某大雅不羣為善最樂制節謹

度榮膺茸纛之華思孝奉先均佚琳宮之遠屬當大享  
克贊盛儀爰加多邑之封仍錫真畬之食於戲莫如同  
姓既先祭澤之頒綏我思成並衍蕃釐之介毋替厥命  
永孚于休

皇叔祖檢校少保安德軍節度使提舉萬壽觀  
會稽郡開國公師潞加食邑食實封制

朕洎吉杪秋乘上辛之正氣肇禋重屋修邃古之盛儀  
惟時公族之英實相躬祠之禮爰均惠術敷告明庭具

官某履行靖莊秉姿和粹度德定位已登亞保之班植  
燾建旄久處祠庭之佚肅雖顯相扈從彌勤爰加多邑  
之封仍衍真畬之食於戲賜齊侯之胙既加一級之隆  
揚召虎之休當繼萬年之頌往服成命踐修厥猷

皇叔祖少傅保寧軍節度使充萬壽觀使師貢  
加食邑食實封制

朕肇禋重屋茂舉盛儀見泰元之尊幸潛孚於鴻造眷  
宗室之老宜先被於龍光錫以命書告于列位具官某

器宏識敏心正氣和植纛建旄均佚祠庭之邃貳公洪  
化峻升亞傳之尊允為公族之表儀多閱天下之義理  
茲講合漢之禮實殫參酌之功爰廣舊封併加真賦於  
戲相予肆祀既綽著於賢勞立愛惟親當首頒於祭澤  
其祇成命益衍蕃禧

少傅保寧軍節度使判大宗正事嗣秀王師彌  
特授少師加食邑食實封制

朕思治勵精以賢制爵明德以親九族久資董正之司



洪化以弼一人盍畀褒遷之寵肆頒顯冊敷告羣工具  
官其典麗才華春容氣度議論冠諸宗室聲名重於朝廷  
非劉氏不王已襲胙土分茅之貴於諸姬為近尤增建  
旄植纛之輝惟夙全信厚之資故特授訓齊之任屬當  
三載因考績以陟明晉拜亞師示尊賢而隆禮實踵棣  
華之舊典益高孤棘之新班申錫爰田仍加真賦於戲  
善於其職已隆公族麟趾之風時乃之休愈壯磐石犬  
牙之勢毋戮朕命勉迪令猷

太傅保寧軍節度使充萬壽觀使永寧郡王楊  
石加食邑食實封制

朕載涓剛日祇見明堂天地祖宗潔牲牢而合饗輝胞  
閤翟徹祭俎以均頒矧予威畹之英入護禁庭之重可  
無茂賞以獎賢勞具官某溫厚而謙恭疏通而樂易輝  
華節鉞登三公一品之班聞望圭璋為四姓小侯之冠  
動必循於法度習盡屏於膏粱屬屆季秋相予肆祀宸  
居密扈既殫雖肅之忱熙事告成盍舉褒崇之典爰加

多邑庸篤懿親於戲錫申伯之田已沐湛恩之溥修廣國之行益延多福之綏茲謂爾榮母替朕命

金紫光祿大夫右相兼樞密使喬行簡加食邑  
食實封制

朕載涓剛日祇見合宮天施地生丕展精禋之報祖功宗德並嚴升侑之儀惟時耆英實陪盛祀爰渙揚庭之號俾均拜胙之釐具官某謨明弼諧年高德劭期予于治每思補過以盡忠克壯其猷首務安民而和衆內銷

姦慝外固封疆致宗祀之熙成獲神歆之嘉況肅雝顯  
相端由左右之勤第祿爾康宜錫褒崇之寵進封多邑  
申衍真畬於戲式典而靖四方益謹儀刑之念享天而  
有一德咸膺享佑之休尚克欽承以永終譽

資政殿學士太中大夫提舉臨安府洞霄宮崔  
與之特授正議大夫右丞相兼樞密使加食邑  
食實封制

朕作新政化總攬權綱思德以承天心欲盡和同之妙

奮庸而熙帝載當資輔弼之良肆選任於耆英俾協圖  
於極治誕敷明命敷告羣工具官某天為時生才不世  
出年彌高德彌劭挺然松柏之後凋事能應物能名炳  
若著龜之先見存臨屏翰綽著恩威久安綠野之遊實  
係蒼生之望比少施於方畧即潛弭於寇攘予嘉乃勲  
亟圖重任胡屢陳於遜牘殊未體於至懷載惟國事之  
多虞正賴真儒之無敵內綏諸夏外撫四夷克壯其猷  
信無踰於元老爰立作相期共濟於巨川廣井邑之提

封增賦租之奠食仍兼樞筦峻陟文階於戲道德之威  
成安強予欲振中興之業股肱之寄在忠力爾其殫叶  
贊之勤庶幾和氣之致祥永使萬邦之作乂勉思康濟  
庸副眷知

保康軍節度使提舉萬壽觀臨海郡開國侯謝  
變禮加食邑食實封制

我將我享既祇見於合宮來下來崇宜永膺於多福敢  
私專鄉期與咸休矧予威畹之英可後徽章之寵誕揚

渙號敦告羣工具官某行歸于周世濟其美致身通顯  
雖聯肺腑之親行已謙恭盡屏膏粱之習陞華茸蠹均  
佚琳庭茲因相事之勤益侈受釐之錫爰加多邑仍衍  
真畬於戲福自己求已獲時歆之况施由親始當先祭  
澤之頒永孚于休毋替厥命

賜安南國陳日昰特授靜海軍節度觀察處置  
等使特進檢校太尉兼御史大夫上柱國特封  
安南國王食邑三千戶食實封一千戶特賜劾

忠順化功臣仍賜襲衣金銀帶制

朕更新庶政奄有四方來獻其琛既展稱藩之禮渙汗其號盍加進律之褒庸侈湛恩以光要服安南國王陳日熒制節謹度和衆安民處黎民之故封纘隴西之舊緒同文同軌夙慕華風來享來王久懷忠節不憚航海梯山之阻欲申望雲就日之忱附奏囊封底貢方物有嘉恭順可後褒崇植纛建旄陞陟公台之貴分茅胙土便蕃使命之華畀井邑之提封衍賦租之奠食併加勲



號益渙寵章於戲修德以來遠人既廣暨南之教率典而藩王室其堅拱北之心永孚于休毋替厥命

史彌忠除寶謨閣待制特賜金帶一條制

引年謝事每嘉靜退之風敬老尊賢特畀蕃之寵以光晚節式渙明綸具官某心醇氣和量宏識遠第昆擢第允同竇氏之聯芳中外交輝咸嘆西平之有子典藩則光宣於惠澤持節則潛弭於寇攘正資立事以建功乃遽辭榮而避寵久處祠庭之佚屢興宣室之思勉徇

雅懷已遂掛冠之請晉升次對復疏錫帶之恩茂對殊  
休益綏壽祉

俞建除祕閣修撰致仕制

引年謝事必加優禮國家常典也矧中外踐更材德昭  
著可無寵渥以示褒崇爾譽冠時髦學通世務入居班  
列正直靖共出秉節麾公勤精練益趣還於清著乃求  
佚於祠庭方興側席之思倏覽掛冠之奏勉從雅志晉  
陞論撰之華爰錫明綸庸表始終之眷祇服朕命蓋介

壽祺

呂殊特授朝奉郎致仕制

量材而授固宜策足於要津厥疾弗瘳遽欲掛冠於神  
武勉從雅志爰錫湛恩以爾學問淵深詞章泉湧聲早  
蜚於黌舍魁屢奪於文闈宜捷出而橫翔乃數奇而不  
偶甫入登於學省旋出贊於輔藩胡因沉疴力求謝事  
憫莫攄於遠業特晉陟於文階茂對時休益綏壽祉

曾從龍致仕制

運籌制勝方十乘之啟行引疾丐休忽一封之來上閔  
勞以事勉徇所陳具官某道德宗工倫魁重望早負經  
綸之志峻登丞弼之司進思盡忠善彌縫而藏用退不  
失正肯俯仰以隨時適更化以厲精圖任人而共治復  
登兩地密贊洪鈞被命視師威欲宣於沙漠憂邊思職  
疾倏在於膏肓既莫殫叱馭之忠姑許遂掛冠之請何  
恙不已佇膺勿藥之祥俾壽而昌尚介如茨之祉

資政殿大學士光祿大夫提舉洞霄宮宣繒除

觀文殿學士依所乞守本官致仕制

尊賢敬老已申進職之褒引疾抗章乃上掛冠之請勉從雅志爰錫殊恩具官某名擅兩優道包衆有定而能應中不倚和不流公矣無私德可尊事可法晉登樞筦參預政機同寅協恭善彌縫而藏用備內禦外每處置以得宜罔以寵利而居成功故能進退而不失正真祠久佚全節愈高圖任舊人冀獲老成之助洊陳奏牘胡為遜避之堅茲偶爽於攝調乃力求於休致噫予嘉乃

德爰晉陟於延恩俾壽而昌其永綏於嘉祉以光終始  
式表眷懷

端明殿學士提舉萬壽觀兼侍讀洪咨夔轉四  
官致仕制

憫勞以事姑令橫帙于邇英惟疾之憂遽欲掛冠於神  
武勉從雅志爰錫徽章具官某特立無朋至剛以直十  
年去國嗟大道之莫容一旦登臺喜真儒之復用聳橫  
秋之鵬鶚無當道之豺狼掖垣銓曹瑣闥翰苑徧歷清

華之選謁騰聲譽之休方資納誨以輔台倏爾抗章而  
謝事猶切憂國愛君之念力陳祈天永命之言允謂忠  
誠益深嘉歎特陟四階之峻庸旌一節之堅茂對寵榮  
以光終始

鄭寅除直寶章閣致仕制

大夫七十而致仕年未及而以疾自陳當憫其勞勉從  
所請俾遂掛冠之願爰疏錫命之恩以爾學廣聞多意  
誠心正厲特立獨行之操有難進易退之風屬當政瑟

之調首被鋒車之召持衡銓選平允無私贊畫鈞樞剛  
方不屈暨司藩屏尤號循良胡染沉疴力求謝事肆加  
爾職以責其歸勉護生經益綏休祉

余嶸致仕制

明綸荐播已躋聽履之班奏牘前陳遽有掛冠之請式  
遵彞典爰錫徽章具官某公爾忘私定而能應入持從  
橐屨殫告后之嘉猷出鎮帥垣蔚有得民之善政久處  
祠庭之佚每興宣室之思圖任舊人雖疊頒於召節晉



升常伯竟莫造於明庭遂疏北闕之恩俾進西清之職  
胡為抗疏乃欲引年勉徇雅懷盍示尊賢之意以光晚  
節俾膺增秩之榮尚克欽承毋忘忠告

李壘轉一官守同知致仕制

追鋒迅召方側席以待賢剡奏上騰欲掛冠而謝事勉  
從雅志爰錫徽章具官某學為儒宗才周世用始終一  
節中不倚和不流敬歷兩朝年彌高德彌劭比以樞庭  
之重載宣蜀道之威突如其來適值陸梁之寇定而能

應力圖捍禦之方正有賴於壯猷乃屢陳於遜牘閔勞  
以事遂疏趣覲之恩盍歸乎來庶獲嘉猷之告豈期嬰  
疾遽致為臣隆禮尊賢晉陟文階之峻考祥視履益延  
壽祉之綏

賓州錄參陳震降一資制

刑者例也一成而不可易故君子盡心焉爾為糾曹實  
司臬事不思審克第欲奉承致使非辜莫伸冤抑劾章  
來上法豈可逃宜錮一資俾知循省

前知蘄州宋逢丑降一官制

留州送使自有成式用踰其數法所必繩爾得雋右科  
踐歷滋久比繇賓閣出守蘄春雖殫備守之勞盍著廉  
平之譽胡因妄費致速煩言鐫爾一階昭吾公憲勉思  
清謹以蓋往愆

李虎特降三官落刺史罷帶御器械制

賞罰軍國之紀綱也苟非信必曷示勸懲爾屢著戰多  
遂膺隆委胡提兵而救援乃激變以紛爭劾奏上聞合

加錫黜當圖後效以蓋前愆

鄒應龍加恩制

天施地生丕展精禋之報祖功宗德並嚴升侑之儀惟  
時文昌實陪祀事既均敷於惠術盍寵畀於褒章具官  
某才擅無雙名推第一出藩入從已登常伯之尊避寵  
辭榮久處祠庭之逸然蒼生願起於謝傳而宣室興思  
於賈生屢膺召節之頒晉陟儀曹之長甫登清署即侍  
親祠迨熙事之告成廣湛恩而敷錫載加多邑以獎賢

勞其益懋於遠猷用對揚於休命

趙彥懌加恩制

具官某風度嚴凝才華肆應不改其操挺然松柏之後凋自明而誠炳若著龜之先見經帷橫帙銓部持衡屬歲祀於九筵實參華於五使迄成熙事敷錫湛恩晉陞封爵之榮仍衍爰田之食莫如同姓既先祭澤之頒綏我思成益衍蕃釐之介往服朕命踐修厥猷

李宗勉加恩制

具官某學問邃深風規峻整持論若權衡之正不激不隨履節如金石之堅可尊可法徧歷諫諍抨彈之職峻登言語侍從之班立以執綏相予歲祀暨迄成於熙事爰廣錫於神釐欲獎賢勞肆封名邑其體寵光之渥益殫獻納之忠

資政殿學士李璫加恩制

敬老尊賢既進升於華職以德詔爵盍申錫於殊恩式渙明綸庸昭隆眷具官某量吞溟渤秀挹岷峨詞章後

學之宗師德望清朝之標準材何施而不可名弗求而自高國十為連屢宣威於戎閭王三錫命遂正位於天官洊躋書殿之穹班仍比樞庭之優禮進封公爵增衍圭田噫名位不同朕既加於異數謀猷入告爾盍罄於精忠茂對寵光以永終譽

魏了翁加恩制

具官某氣塞兩間學希百聖蹇蹇匪躬之節公爾忘私惓惓憂國之忠言無不盡晉躋右府大展壯猷式邁其

行已宣威於督府渙汗其號俾入覲於昕庭胡存騰遜  
避之章竟莫遂挽留之意暫處真祠之佚實勤宣室之  
思茲以受釐可忘錫祉肆進加於封爵仍申衍於爰田  
噫來下來崇豈朕躬之專鄉俾昌俾熾當與國以咸休  
茂對寵光益圖經濟

授內官韓申範等加恩制

榮居近要密總重難君上之恩渥則殊而人臣之敬思  
尤切其有端靜無失進退可稱而復以幹能彰於官業



名隨位進行與才兼者不有異遷何示獎勸宣徽小馬  
坊使某絜矩操心溫潤成器剛而不暴柔而不回宣徽  
含光使某本於誠明文以禮讓止而不滯行而不流起  
宣徽南院副使某明見事情智通微妙光而不耀晦而  
不幽皆調金玉之聲並秀松筠之色至於績效實謂著  
明嗚呼守職奉公爾既盡其節矣崇階厚祿吾豈刊於  
印哉可依前件茂對寵休

鄭性之除資政殿大學士知紹興府浙東安撫

使制

善斷善謀入任樞庭之寄維藩維屏出司帥閫之權中外雖殊眷懷則一具官某忱恂而直諒寬大而高明聲名滿四海之間德望冠羣公之表周旋兩地終始一心知無不言每務庇民而尊主粹然出正未嘗揚己以取名方資協恭而和衷乃力辭榮而避寵晉躋書殿庸昭體貌之隆渙發名綸俾鎮股肱之郡雖使大臣之均佚實令一道以蒙休噫勉為朕行當使會稽之增重不遠

伊爾抑寬宣室之興思尚克欽承益攄經濟

黎伯登除直煥章閣主管潼州路安撫制

蜀道去天遼邈帥垣之寄責任匪輕非踐敬滋久望實  
素孚者曷稱其職以爾安恬不競詳練有謀入造班行  
咸推賢德出更麾節荐著休聲載惟瀘南素號重鎮矧  
值繹騷之警正資牧御之才采之僉言無以易汝肆遷  
遂閣俾任藩宣勉圖爾庸以寬憂顧

資政殿大學士李壘除同知樞密院事四川宣

撫使制

克壯其猶宜任元戎之寄渙汗其號晉陞右府之崇增  
重事權式符人望具官某年高德劭節勁氣和聲名滿  
四海之間文武為萬邦之憲載惟全蜀重遭疆敵之憑  
陵雖建制垣復命大臣而撫諭茲置宣威之任益恢御  
外之規庸陟副樞以昭隆委既恩信之素著必處置以  
得宜噫屬老臣勿以為憂當有萬全之計用真儒而焉  
得削佇收無敵之功永底救寧以寬憂顧

權工部侍郎徐清叟除集英殿修撰知靜江府  
廣西經畧安撫使制

荷囊持橐方入造於從班宣化承流姑出分於戎閫肆  
加爾職以寵其行具官某學造淵深氣全剛大有是父  
有是子俱著聲名難為弟難為兄交輝中外已振激揚  
清濁之職晉登論思獻納之司力避寵榮暫循更迭然  
興思於宣室尋趣侍於甘泉胡復懷勇退之心竟莫遂  
挽留之意陞華秘殿作屏帥垣知無不言既善盡忠而

補過施於有政必能以道而得民勉務拊綏以寬憂顧  
李華直徽猷閣湖南安撫使制

自湖以南地通蠻徼鎮撫之任必賴長才以爾質秉剛  
方資兼文武隨機應變屢奏膚公奉使典州謁騰休譽  
肆陞邃閣擢鎮帥垣理民馭軍備內禦外使寇攘影滅  
而郡邑堵安皆爾所已試者益圖來效以副深知

趙師楷直寶章閣廣東經畧安撫制

自廣以東凡十四郡悉隸帥垣事權至重欲稱維藩之

任必資已試之才以爾標的宗盟被服儒雅踐更中外  
所居見稱昨將漕於五羊嘗攝承於戎閫內給餉餽外  
弭寇攘一道堵安厥績甚茂今茲謀帥無以易汝爰陞  
邃閣以寵其行威望素孚當不勞而治矣往服厥職嗣  
有異恩

陳韡轉兩官除閣學依舊建康府江東安撫使  
兼沿江制置使兼淮西制置使行宮留守制

護長江之險未究壯圖兼邊面之權式昭隆委肆加恩

渥庸示眷懷具官某勁氣橫秋精忠貫日識微見遠至  
能應來能名整師修戎櫻者推觸者滅自司留鑰屢奏  
膚功已殲京口之逆儔復抗敵兵而鏖戰論功行賞遂  
疏北闕之恩進職遷官并總西淮之寄既事權之增重  
而威望之素孚立致安彊以寬憂顧

趙善湘依舊資政殿大學士知紹興府浙東安撫使制

大邦維屏甫資綏御之方十國為連易畀藩宣之寄事



權增重簡卷彌隆具官某善斷善謀允文允武施無不  
可真所為王佐之才卓爾不羣豈特藹宗英之譽曩司  
制間久閱歲華出六計之奇指授將帥決千里之勝勦  
滅渠魁肆陞書殿之華仍視樞庭之秩真祠均佚宣室  
興思雖蜀道之行不憚於王尊而渤海之安莫如於龔  
遂暫煩鎮撫復命保釐噫式過其行庸壯維城之勢不  
遠伊邇實同衣錦之榮盍展壯猷以稱朕意

袁甫依舊寶章閣待制知福州福建安撫使制

求禮樂詩書之帥方切疇咨非言語侍從之臣曷當隆  
委克稱厥職宜莫如卿具官某學深道原才周世用裒  
然為首聲名滿四海之間知無不言氣槩出羣公之表  
清華偏歷進退兩高宣化承流雖屢頒於成命辭榮避  
寵迺荐奏於封囊載惟全閩素號樂土八命作牧正需  
綏馭之才十國為連俾任藩宣之寄况嘗兼於漕節已  
備悉於民風諒善推其所為當不勞而自治其祗茂渥  
庸副至懷

王遂除四川制置使制

戎閫係於安危當求禮樂詩書之帥朕心為之憂顧特  
輟言語侍從之臣爰錫徽章晉陞次對具官某身兼數  
器望重羣公有能定能應之才負至大至剛之氣峻登  
言路力振朝綱擊搏何心縱橫秋之鵬鴉姦邪褫魄無  
當路之豺狼擢寘貳卿正圖大任屬坤維未臻於奠枕  
而制垣正藉於協謀暫煩王尊叱馭之勞期底諸葛理  
民之績能勝其任豈嫌蜀道之難式遏其行當使雪山

之重其思康濟用副眷懷

趙葵除端明殿學士淮東制置大使制

整旅伐戎喜見敷功之奏揚庭孚號荐頒異數之榮以  
穆僉言式昭隆眷具官某忠誠貫日氣節橫秋善哉充  
國之知兵信矣西平之有子久司制閫綽著威聲屬安  
豐遭黥寇之侵凜然難保迨幕府遣精兵之援莫或敢  
櫻亟收三捷之功即賜十行之札雖已躋於常伯未足  
報於殊勲端殿陞華使名加大俾復青氈之舊仰振家

聲佇清紫塞之氛益強國勢欽承予命嗣有異恩

杜杲除兵部侍郎淮西制置使制

整師修戎已殄陸梁之寇論功行賞可無優異之恩宸  
命誕敷師言允穆具官某忠於謀國勇不顧身昨守邊  
城屢排鋒而挫銳暨分制閫復先事以預防鑿斯池築  
斯城敵乃干轂乃曹惟內治之既固豈外敵之能侵突  
如其來意謂摧枯而拉朽凝然不動乃能應變而隨機  
雖相持至閔於數旬而鏖戰竟收於三捷大築鯨鯢之

觀大肆貌虎之威予嘉乃勲晉陟貳卿之職爵以勵世  
復加峻秩之榮仍正任於使華俾專司於戎閫益圖偉  
績嗣有殊恩

趙彥訥除煥章閣學士依舊四川安撫制置使

制

制閫疇庸已正貳卿之位旰庭渙號復陞學士之班增  
重藩宣益隆眷倚具官某詩書元帥禮樂宗英至能應  
來能名潛攄妙算排其鋒挫其銳屢奏膚功屬邊境之

繹騷提孤軍而捍禦灰飛強寇枕奠坤輿予嘉乃勲遂  
真除於武部徒得君重仍因任於制垣載疏北闕之恩  
申錫西川之職惟聖人能無外患孰與圖功而元老克  
壯其猶正資協力勉思康濟以寬顧憂

史嵩之除淮西制置使沿江制置副使兼知鄂  
州制

扶風馮翊方資藩翰之功邊境要衝尤賴捍防之力蓋  
理內當嚴於御外而制難惟在於得賢具官某望聳萬

夫身兼數器能定能應規摹自得於胸中惟幾惟深  
略不專於紙上矧十載勤勞於疆場而三軍思慕於恩  
威載念西淮密鄰敵境瞻言鄂渚實控上流非制閫之  
得兼恐事權之難一徒得君重勉為朕行師克在和尤  
貴并謀而合智事難預度要當應變以隨機皆爾優為  
奚煩多訓

鄧泳除太府丞兼知鄂州制

鄂渚控扼江面實為要衝儻非智略之長曷稱藩宣之



寄以爾清修儒雅詳練精明文武兼資無施不可邊陲  
十載備歷艱勤制幕疇庸荐疏渙渥大邦維翰咸曰汝  
宜肆陞外府之丞爰錫左符之命仍參籌於督府庶益  
壯於長城勉立殊勲以稱朕意

杜杲除太府卿兼淮西制置兼知廬州制

載惟西淮實繫衝要必威名之夙著庶處置之得宜以  
爾允武允文善謀善斷久宣勞於疆場每有志於事功  
比鎮安豐適當強敵厲兵備禦極力勦除城壁賴以安

全強鄰為之震攝雖亟加於褒律未足報於殊勲疏寵而畀制垣遷秩而長外府庸示便蕃之渥其殫牧御之方勞來流移謹固封守以恩威而相濟俾兵民之俱安蓋爾所素明者益圖偉績嗣有異恩

李華除江西提刑兼知贛州制

節麾兼任其責匪輕非才周世用隨試隨效者曷膺茲選以爾允文允武善斷善謀作屏鄣江民安盜弭觀風東廣吏戢兵懷惟爾之能無施不可易畀西江之節仍

分章貢之符思患預防恩威兼濟使姦宄不作而田里相安皆汝所素明也勉圖來效嗣有異恩

楊恢除太府少卿兼潼川利路制置副使兼利路運判兼知利州制

一身而兼數職最號劇煩非才周世用屢試有功者蓋不輕畀以爾資兼文武識炳眇綿應變隨機恢乎餘刃欲求禮樂詩書之帥往鎮西陲采之公言無以易汝肆升卿月晉貳制垣郡寄計臺併以命汝其任固不輕矣

備內禦外理民馭軍使調度不乏而暴亂潛銷則予汝  
懌其祇成命益展壯猷

楊恢除寶章閣待制四川制置使兼知利州制  
惟爾之能宜副元戎之職其猶克壯盍專制閫之權復  
錫明綸以昭隆委具官某資兼文武識炳眇綿思患預  
防益固黃岡之勢隨機應變潛銷紫塞之塵晉陟列卿  
肅將使指屬三路重遭於紛擾非一賢孰任於驅攘特  
陞次對之華盡總西維之寄外禦其侮當為折衝強本

之謀適觀厥成庶底和衆安民之績勉思經濟以寬顧  
憂

陳睪除沿海制置使兼知慶元府制

尚書喉舌之官夙資出納河東股肱之郡今賴藩宣允  
楊師言肆頒渙號具官某才周世用譽冠時髦久宣制  
間之威潛攄妙算隱若長城之衛坐折遐衝遂膺召節  
之頒晉陟文昌之位暫從均佚殊鬱壯猶念四明實控  
於要衝在三輔夙稱於巨鎮徒得君重庶幾善政以得

民勉為朕行冀使京師之蒙潤亟圖治最以副予知

史巖之除太府卿兼知臨安府制

外府任貨財之職京兆司彈壓之權於二者而得兼非  
大才而曷可以爾靖共而和粹精敏而疏通外則馳計  
臺帥聞之聲內則稱銓部蓬山之職宜晉升於卿月俾  
兼鎮於神臯然受藏出納之司不難鉤考而衆大浩穰  
之地尤賴藩宣必勤敏以無私而寬嚴之相濟庶豪猾  
不容於私撓而兵民各遂於相安爾所優為奚勞多訓

李壽朋直顯謨閣知太平州制

當塗素稱道院事簡民淳法從重臣多均佚於此然控  
扼江面實為要衝思患預防誠不容緩能勝其任必賴  
通才以爾稟資雋敏臨事激昂分閫典藩究心兵畧厥  
有成績所居見稱久鬱壯猶興思宣室晉升遽閣俾任  
藩宣以昔日之規摹為此時之捍禦佇觀來效嗣有異  
恩

李昉英直秘閣知贛州制

章貢素號雄藩比年以來綠林屢警殊費捍防必資隨  
機應變之才庶底和衆安民之績以爾鼎魁重望實德  
醇儒再入周行荐膺清選雖禁闥當用於汲生而渤海  
尤資于龔遂晉陞憲閣出鎮大邦昨贊畫于帥垣克平  
羣醜今往膺於郡寄必有壯猶勉務拊綏以寬憂顧

陳壇直寶文閣江西安撫制置使知江州制

國十為連允謂重任王三錫命遂畀茲除以爾直哉惟  
清定而能應運籌決勝盜息民安宣化承流刑清訟簡



隨試輒效所居見稱載念帥垣實任撫綏之寄至于江  
面尤關要害之衝非爾長才曷稱茲職爰陞華於邃閣  
俾克展于壯猶茂對殊休勉圖偉績

